

Festa federala da tir – Adüna ils deschers in mira

As metter in posiziun, mirar, as focussar, trar il flà e tegner la nerva infin il mumaint decisiv. Trar cul schluppet es ün'importante part i'l temp liber ed üna da las plü grondas paschiuns da la treganta Cornelia Valentin, oriunda da Sent, chi viva a Cuoir.

Il cumün nativ da Sent es quel lö ingio cha tuot ha cumanzà pella treganta cun corp ed orma, Cornelia Valentin, e quai be per cas. «A Sent haja dat avant üna pruna, pruna ons ün nouv Vita Parcours», s'alorda la treganta da 41 ons in üna Marella da Radiotelevisiun Svizra Rumantscha (RTR). E dūrant quistas festivitats d'inauguraziun daiva tanter oter eir la pussibiltà da trar cul schluppet dad ajer.

«Là d'eiran ils tregants – ch'eu nu cugnuschaiva amo, insomma neir il sport na. E cun mia collega da scoula eschan nus duos idas via a trar e vain toc tuottas duos magari bain.» Gnüda sün quai invidada da la Società da tregants Sent da pudair visitar üna jada ün da lur trenamaints, es Cornelia Valentin ida a verer – e restada fidela al sport fin al di dad hoz.

Ün sport chi fascinescha

Il sport da tir pretenda concentrasiun maximala, controlla dal corp e forza mentala, qualitats cha Cornelia Va-



Cornelia Valentin – treganta cun corp ed orma ed adüna ils deschers in mira.

fotografia: RTR

lentin ha perfecziunà dūrant divers ons. E ch'eir amo davo 25 ons sajan las algordanzas, las emoziuns e la paschiun pel trar amo adüna uschè preschaintas sco da plü bod, manaja Cornelia Valentin plünavant. Hoz però na

plü a Sent, dimpersè in sia nouva patria a Cuoir.

Quia es Cornelia Valentin commembra da la società da tregants a Haldenstein, ingio ch'ella tira sün 300 meters cul schluppet standard e pro'ls

tregants da sport a Domat, ingio ch'ella tira sün 50 meters cul caliber pitschen. E gūsta quista disciplina cul caliber pitschen es quella disciplina, illa quala ella as chatta il plü ferm da chasa. «A mai fascinescha enorm chi's

riva da tocker üna schaiibia sün lunga distanza», quinta Cornelia Valentin be fö e flomma, ed agiundscha: «A Sent gniva adüna sajettà be cull'arma da militar. Sch'eu vess cugnuschü fin-già plü bod eir otras armas, sco per exaimpel il caliber pitschen, vess üna via professiunala eir pudü esser ün'opziun.»

Tanter cumünanza e concorrenza

Restar fidel ad ün sport eir sainza esser part da la scena professiunala: Per Cornelia Valentin vala il barat cun collegas tregantas e tregants, e la cumünanza in società gūsta uschè bler sco il success sportiv s vess. Eir sch'ella guarda s'inclegia gugent inavo sūls agens success dal passà.

Ed üna concorrenza chi tilla resta impustüt in memoria, es il titel da campiunessa svizra al final dals giuvenils e veterans dal 2004 a Thun. «Eu sun ida giò Thun sainza spettar ün bun resultat. Eu sun simplamaing ida giò, n'ha trat e n'ha guadagnà. Ün bel mumaint, a s'al-gordar. Uossa n'haja a chasa üna medaglia d'or e divers artichels da gazetta.»

E chi sa, forsà cha la prosma medaglia ed artichel in gazetta pudess dvantar bainbod darcheu realtà per la treganta cun corp ed orma, Cornelia Valentin?! Quai dūrant la festa federala da tir chi ha cumanzà quists dis a Cuoir e con-tuorns, ed adüna ils deschers in mira.

(rtr/fmr)

RTR ha realisà ün'emischiun Marella culla treganta paschiunada. La cumpletta Marella da Cornelia Valentin as poja tadtir sün rtr.ch obain sün Play RTR.

Ils partits e lur raps

L'import da raps cha'ls partits chi candeschan per la Regenza grischuna impuondan pel cumbat electoral variescha. Ma mincha parti pudess cumprar ün auto da luxus cun quists raps.

Ils partits impuondan sommas tanter 155000 e 240000 francs pel cumbat electoral per la Regenza grischuna. Sommas ch'els pudessan investir in autos luxurius: Mercedes, Porsche, Aston Martin e Ferrari. Cun quai ch'ün parti nu vout tradir l'import da raps, resta la marca da l'auto per quel parti secret.

PVL: ün Mercedes

Il preventiv il plü modest pel cumbat electoral per Parlamaint e Regenza paran dad avair ils verdliberals. Els impuondan in tuot var 155000 francs chi vegnan da differentas funtanas. «Ils

raps derivan da contribuziuns da las commembras e dals commembers dal parti, da taxas da mandat dals titulars e da las titularas d'ün uffizi sco eir da donaziuns», disch la presidenta Géraldine Danuser. Quai bastess sgüra per ün fich bun Mercedes «Per las eleccziuns dal Cussagl grond vaina quasi redublà la summa», uschè la presidenta. La radschun saja cha'l parti haja ragiunt l'ultima jada fermezza da fracziun. Perquai haja il parti daplü taxas da mandat e pudü inchaschar daplü.

Il Center: ün Porsche Carrera

Ün pa daplü raps impuonda il Center. Cha là sajan quai var 180000 francs. Quai bastess probabelmaing fingià per ün Porsche Carrera. Ma cha'l preventiv saja plü bass co pro las ultimas eleccziuns avant quatter ons, disch il schef da campagna Fabian Collenberg: «Avant quatter ons d'eira il preventiv sgüra plü ot, cun quai cha nus vain lura fat la fusiun dals duos ante-

riurs partits e tras quai amo decis ün pèr masüras daplü i'l cumbat electoral, impustüt per pudair preschantar eir nos parti a las electuras ed als electurs.» Plünavant disch el: «Vi dals cuosts da quels 180000 francs cha nus vain, impuonda mincha candidata e mincha candidat circa 20000 francs.»

PS: ün Aston Martin Vantage

In üna sumgliainta classa da predschiuss eir il bolid dals socialdemocrats. Cun s-chars 200000 francs bastess quai per ün Aston Martin Vantage. Cha l'import saja sumgliaint sco avant quatter ons, disch il schef da campagna Joshua Wada. «Nus dain oura ün pa daplü pro las tschernas da la Regenza – nus discurrin quia però da 10000 francs daplü.» Ingio chi detta listess amo üna vaira differenza saja pro las eleccziuns dal Parlamaint e pro las eleccziuns dal Cussagl grond. Cha là dettan els oura bod 30000 francs

plü pac. Il motiv: Ch'els fetschan daplü internamaing, impustüt l'inter layout.

PLD: ün Ferrari Roma

Ün cresus in congual culs oters partits para dad esser il parti liberaldemocrat. Quel pudess probabelmaing cumprar sainza problems ün Ferrari Roma cun seis preventiv pellas eleccziuns: Circa 240000 sajan quai quista jada, disch Christof Kuoni chi maina la campagna dals liberals. Eir pro'l PLD vegnan ils raps da differentas funtanas: Chi sajan dad üna vart raps our da la chascha dal parti, illa quala chi's fetscha minch'on reservas, i'ls ons sainza eleccziun. Da l'otra vart detta amo raps chi vegnan generats our dal club da fans sco eir da donaziuns. Il PLD es cuntshaint sco parti d'economia, ma cha quella nu saja gnanca uschè ferm partecipada vi dals cuosts dal cumbat electoral: «I sun donaziuns da 20000 francs, impustüt da persunas privatas. da l'economia vain

be üna pitschna part dals raps», declera Christof Kuoni.

PPS: L'auto resta resta secret

Il parti popular svizzer percenter nu tradischa quants raps ch'el piglia in man pel cumbat electoral: Roman Hug, il president dal PPS disch chi nu's vöglià comunichar las cifras. «Nus sco partida nu comunicain ingünas cifras concretas.» Cha'l PPS haja impustüt il sustegn, la lavur voluntaria dals 120 candidats e da la candidata pel cussagl guvernativ, disch el. Cha per quist motiv nu possan els as prestar campagnas charas, dimpersè sajan cumplettaimaing dependents da l'ingaschamaint da minchün. Ma eir pro'l PPS bastessa sgüra eir per ün veicul da quatter roudas. Probabelmaing per ün sumgliaint bun sco pro tschels partits, listess che resultats cha las eleccziuns dals 14 gün varan: L'üna o l'oter chi perda pensa forsà fingià davo las eleccziuns ch'el o ella vess cumprà meglider ün auto da sport per tuot quels raps.

(rtr/fmr)

Ün ultim grazia fich a Robert Meier (1929–2026)

Necrolog Ün pionier da las forzas idraulicas in grischun nun es plü. Robert Meier es mort als 31 mai cun 96 ons. Il giuven indschegner es gnü dal 1960 a Tavanasa per fabrichar las Ouvras dal Rain anteriur e tschinch ons plü tard es el gnü a Zernez ingio ch'el ha fabrichà sco prüm directer las Ouvras electricas d'Engiadina. El ha manà las OEE cun success – eir dals cumüns – dūrant 30 ons. Dal 1962 fin 1970 sun gnüts realisats ils fabricats tanter S-chanf e Scuol e quels dal Spöl. Passa 1400 lavuraints as sfadiaivan sün 13 plazzals da fabrica. Eu dod amo hoz co cha'ls stagionals talians giovai-van la saira a tschinquina sur nossa chasa, qua chi fabrichaivan quella vouta eir la via da dis-charg da Scuol.

Sur quella nun existivan quella vouta chasas... Cün premura ha Robert Meier persvas il cussagl adminitrativ da realisar eir il s-chalin suot. Dal 1994 es gnüda inaugurada eir l'Ouvra da Scuol a Martina.

Ma Robert Meier guardaiva plü inav- vant. El trattaiva cun l'Austria per trar a nüz eir l'aua da l'En tanter Martina e Prutz i'l Tirol. Sco giuven advocat vaiv eu tschüff l'incumbenza da preparar la concessiun dal GKI pel cumün da Tschlin ed uschea n'haja impris a cugnuoscher a Robert Meier chi d'eira 20 ons plü vegl. Las OEE sun hoz parteci-padas cun 15 pertschient eir vi dal GKI. Cün quell'ouvra ha pudü gnir scholt eir il problem dal sbrüj (Schwank-Sunk). Il president da las OEE actual, dr. Martin

Schmid, ha scholt eir il problem finan-zial cun bravura, eir per noss cumüns. Eu sun stat uschè cuntaint cha Robert Meier ha pudü esser preschaint dal 2022 cun 93 ons pro l'avertüra dal GKI a Prutz e cha Jon Duschletta ha pu-dü far üna stupenda intervista illa Posta Ladina.

Hoz toccan las OEE pro las desch plü grondas Ouvras idraulicas in Svizra. Robert Meier am telefonaiva bod mincha mais per esser al curraint. Üna vouta l'on ans chattaivan per ün giantar, pel solit a Landquart, e seis ögls glüschivan. L'ultima vouta m'ha scrit Robert per Silvester 2025 cun la dumonda plaina da spiert «Wer holt 2026 die Kastanien aus dem Feuer?» Eu til n'ha respus cun custabs fich gronds, qua

ch'el dovraiva la lupa per leger, e til n'ha ingrazchà amo üna vouta per tuot, eir per noss cumüns.

Davo sia pensiun vivaiva'l cun sia duonna Myrtha a Samedan. Là ha el scrit il cuntshaint cudesch sur da las OEE chi serva hoz eir a nossas scoulas cun la frasa remarchabla « Ich habe viel erlebt, viel gegeben, aber auch viel gewonnen.» Sco capo cumünal da Scuol e sco president dals cumüns concessiunaris m'impreschiunaiva impustüt il «trattar» cul directer Robert Meier. El nu daiva mai l'impre-schiun da vulair trar la cuntrapart sur la maisa via e d'eira adüna realist. Eu m'algorid fich bain cha Robert vu-laiva üna vouta s'acquistar per las OEE la riva da l'En a Pradella chi nu serviva

nüglia al cumün e ch'eu til n'ha dit sco capo, cha'l cumün da Scuol nu vöglià raps, ma terrain da las OEE illa zona da fabrica vers vest da l'asil per vegls Punt'ota. Robert Meier es stat stut, ma davo ha el istess dat in barat al cumün passa 10000 m² terrain. Hoz es quel terrain illa zona d'ütil public e Robert Meier faiva spranza ch'ün di dessa là abitaziuns favuraivlas per indigens. Hoz vegn fabrichada üna canorta sper l'asil ed il giavüsch da Robert Meier spetta. Mia figlia Margarita es co-presidenta da la chüra d'uf-fants Engiadina Bassa ed uschea as serra il rinch.

Riposa in pasch Robert Meier e grazia per tuot!

Not Carl, plü bod capo da Scuol